



11. juni 2018

**SIUMUT
INATSISARTUT**

UKA2018/115

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imattoq matumuuna saqqummiupparput:

Apeqquteqaat aallaavigalugu oqallinnissamik siunnersuut: Ingerlatseqatigiiffissuit Namminer-sorlutik oqartussanit pigineqartut siunissami inuaqatigiinni qanoq iliuusissatigullu pilersaarutini qanoq inissisimatinneqassappat.

(Inatsisartunut ilaasortaq Karl-Kristian Kruse, Siumut)

Tunngavilersuut

Siullermik nuannaarutigaara oqallinnissamik siunnersuut manna saqqummiussinnaagakku.

Nunatsinni suliffeqarfiiit pisortat pigisaat – taamaasillatalu inuaqatigiit tamatta piginneqataaffigisavut – suliffeqarfiiit taakku assigiinngitsutigut kiffartuussisuupput, uagut inuaqatigiit ikittuinnaalluta nunarujussuarmi siammassisumik imminnullu ungaseqisunik najugaqarfeqluta pisariaqartitagut assigiinngitsut qulakkeerniarlugit.

Ilaatigut assersuutigalugu innaallagissiorikkut kiassarnikkullu pisariaqartitagut Nukissiorfinniik neqeroorutigineqarput.

Aamma taamatut qiviarsinnaavarput KNI. KNI'p ingerlappai Pilersuisoq Polaroil-ilu. Avinngarusimasut nunaqarfiillu nioqqutissanik pisiniarfeqarnikkullu qulakkeeqqavai inuit taakkunani najugallit kiffartuunneqarnerat, Polaroil-ip nunarput tamakkerlugu ikummatisamik pilersorpa.

Nuna tamakkerlugu kiffartuussisut suliffeqarfiiit taakku, pisortanik pigineqartut aaqqissuussaaneri ukiorpassuit ingerlanerini ineriantorput allanngorarlutillu, ilaatigut apeqqutigerusussinnaasarlutigu suliffeqarfiiit eqaannerusumik akilersinnaanerusumillu ingerlanneqarsinnaannginnersut, aamma piffissanngunginnersoq suliffeqarfiiit Namminersorlutik oqartussanit pigineqartut ineriantorteq-qillugit aaqqissuuteqqinnejarnissaannut.

Siunnersuut manna periarfissaasinnaasunik oqallinnissamik nalilersuinissamillu ujartuisuuvoq, inuaqatigiinni marloqiusamik allaffissornikkut ingerlatsinnginnissamik aammalu ineriantornermut aaqqissuuseqqinnernullu pisariaqartunut innarliinngitsumik uagutsinnullu akisuallaalertinngin-nissamik.

Isumaqpunga pingaaruteqartoq isiginiaassallugu suliffeqarfiiit nunatta pigisaasa aningaasarpassuit atunngikkaluarlugit nutarteriffiginissaat suliffeqarfittut pitsaanerpaanngortinnissaat anguniarlugu, matumanit amigaataasoq unaavoq periaatsip ajunngitsup naninissaa. Assersuutigalugu umiarsuali-

vinnut oqartussaasutut Royal Arctic Line inissisimavoq umiarsualivinnik ingerlatsisuutigaluni aamalu pisortanit suliffeqarfiutigineqarluni, aammalu saniani Sikuki pisortanik suliffeqarfiutigi-neqartoq Nuummi umiarsulivimmik ingerlatsivoq.

Qanoq iliornissaq pillugu imminut akilersinnaanerpaamik toqqaareersimagaanni naak sorpassuit ilanngullugit nalilersuisoqqaartussaagaluartoq, taava pisariaqarpoq nalileqqissaassallugu tamanna inuiaqatigiinnut akikinnerusumi aaqqiissutaanersoq, assersuutigalugu inuiaqatigiinnut akikinnerunnginnerluni, Sikuki Royal Arctic Line'p ataanut inissikkaanni, soorlu Arctic Umiaq Line, taamaattoq.

Assersuutitut aamma qiviarsinnaavarput, Telepost-i. Allakkeriviulluni telekkut attaveqaatinik ingerlatsisoq, uani oqaluuserineqanngilaq suliffeqarfiit immikkoortut marluk ingerlanneqarnissaat. Susassaqarfippassuupput sukumiisumik misissuiffigineqarnissamut naleqqussinnaasut, soorlu aamma mittarfeqarfiit Ineqarnerullu aaqqissugaaneri siunissami qanoq aaqqissussinnaavagut ingerlatsiviit akikinnerulersillugit pitsaanerulersillugillu, naatsumik oqaatigalugu: suliffeqarfinnit taakkunannga siunissaq eqqarsaatigalugu suna kissaatigaarput.

Susassaqarfii arlaqartut, soorlu mittarfeqarnikkut inissiaateqarnikkullu aaqqissuussinerit akikinnerusut pitsaanerusullu qanoq ittut siunissaq ungasinnerusoq isigalugu, pilersissinnaavagut?

Taamatut oqaaseqarlunga, Namminersorlutik oqartussanit pigineqartut Ingerlatseqatigiiffissuit Nunatsinni inuiaqatigiinni siunissami qanoq ingerlatsinissaat pillugu inatsisartut oqalilluarnissaat neriuutigaara.